

მიტროპოლიტ შიოს სიტყვა იოანე ზოსიმეს ხელნაწერის საქართველოში ჩამოტანასთან დაკავშირებით



საპატრიარქო ტახტის მოსაყდრის, სენაკისა და ჩხორონყუს მიტროპოლიტ შიოს (მუჯირი) სიტყვა იოანე ზოსიმეს ხელნაწერის საქართველოში ჩამოტანასთან დაკავშირებით

ყოვლადსამღვდელონო მეუფენო, მამებო, ძმებო და დებო, გილოცავთ დღევანდელ დღეს.

დღეს აღვნიშნავთ შესანიშნავ მოვლენას – ამ დიდებული ხელნაწერის, პალიმფსესტის, საქართველოში ჩამოტანას და ვფიქრობთ ჩვენს კულტურულ მემკვიდრეობაზე, ჩვენს ისტორიულ სიძველეებზე, მის მნიშვნელობაზე.

მახსენდება წმინდა პატრიარქ კირიონის სიტყვები ჩვენს ხელნაწერთან და

არქივებთან დაკავშირებით. იგი ბრძანებს: „ხელნაწერები, არქივი – ეს არის სამართლიანი მემკვიდრეობა, რომლის პირითაც ღაღადებს ჭეშმარიტება და რომლის თვალთაშვითაც გვიცქერია ჩვენი წინაპრები, რომელთა მემკვიდრეობითაც შესაძლებელია, თვალი გადავავლოთ ჩვენი წინაპრების ღვაწლსა და საქმეს. წინაპართა ღვაწლის შესწავლის გარეშე კი შეუძლებელია, გაიგო აწმყო, და ასევე ჯეროვნად იმუშაო ჩვენი მომავალი კულტურული და ეროვნული საქმიანობის“, – აი, ასეთი შესანიშნავი სიტყვებია. ამრიგად, უდიდესი მნიშვნელობა აქვს ჩვენი ისტორიული სინამდვილის მოვლა-პატრონობას და დაცვას.

მინდა, განსაკუთრებული მადლობა გადავუხადო ბატონ ბიძინა ივანიშვილს, რომელმაც ამ დიდებული შენაძენით გაამდიდრა ჩვენი კულტურული მემკვიდრეობა და შეგახსენოთ, რომ დღევანდელი დღე დაემთხვა ივერიის ყოვლადწმინდა ღვთისმშობლის ხატის საქართველოში ჩამობრძანებული ასლის ხსენებას, ასევე უფალ იესო ქრისტეს საყვარელი მოწაფის, წმინდა იოანე ღვთისმეტყველის ხსენებას.

ღვთისმშობლის მეოხებითა და წმინდა იოანე ღვთისმეტყველის ლოცვით, უფალმა დაგლოცოთ, გაგაძლიეროთ, უფალმა დალოცოს, გაამთლიანოს და გადაარჩინოს სრულიად საქართველო, ამინ.

საქართველოს საპატრიარქო

9 ოქტომბერი, 2024 წელი

ელექტრონული ვერსია მოამზადეს ანზორ ჩიქობავამ და თამარ ასათიანმა